

諸菩薩求佛本業經

與菩薩本業
經同本異出

西晉清信士聶道真譯



清刻龍藏佛說法變相圖

三經同卷

諸菩薩求佛本業經

菩薩十住行道品經

佛說菩薩十住經

率一

諸菩薩求佛本業經 率一 與菩薩本業經同本異出

西晉清信士聶道真譯

憍那師利菩薩問文殊師利菩薩菩薩何因
身有所行不令他人得長短口所言不令他
人得長短心所念不令他人得長短何緣身
不行他人長短口不說他人長短心不念他
人長短持是身所行口所言心所念衆阿羅
漢辟支佛及諸天世間人民所不能及知身
所行口所言心所念無有能逮者無有能動
轉者身所行口所言心所念無有能周者身

所行口所言心所念皆成就遂意身所行淨
潔口所言淨潔心所念淨潔身所行無瑕穢
口所言無瑕穢心所念無瑕穢身所行智慧
在上頭口所言智慧在上頭心所念智慧在
上頭生時端正生時智慧生時布施生時種
類中好生時於尊貴家生時面色好生時善
相與衆異意所念皆強多所護持不忘無所
愛惜高才猛健猛中尊猛中貴猛中勇猛中
勇猛中有無有比所議爲無有能計量者所
議無有央數所議爲不可計無有邊幅無有

能勝者慈愛於佛經皆前世筋力行所致多
所出入語者人皆信用之無有不敬附者身
所行無有不淨潔者諸所視經無有不了知
者一心降意思惟明曉偈念入禪出入五音
中入於四事入於三事中入於十二事中過

去當來今現在所出生福祐功德中入於七
覺意中入於虛空無常無所罣礙中入於六
波羅蜜經中悉具足念善慈愛愍傷等心悉
無所憎愛入於十種力慧中爲諸天梵釋阿
須輪鬼神龍所供養悉愛護十方人諸有驚
怖者皆歸仰得解諸有恐懼急緣者無不得
安隱者明於十方如燈火如炬火如大火如
日月過度諸世間人如船楫如船中人有導
師於諸天世間人民蛸飛蠕動之類極善極
豪都於大衆中最獨尊雄中復重雄極上無
有與等者如是法當何以致之文殊師利菩
薩語憍那師利菩薩言善哉善哉佛子所問
乃爾極大慈愛多所度脫乃作是發意問所
問者皆有佛子菩薩身所行有口所言有心
所念有意所念道諸所施行功德悉可得未

曾增減佛經時過去當來今現在佛悉受得之皆從是起成皆使世間人民悉安隱諸所說經悉諦受諸所有宿命惡悉消盡諸經悉受得之諸所有皆快諸所有皆好無有與等者如是佛子行於大道者悉皆得之菩薩居

家法心念言十方天下人皆使莫爲愛欲所拘繫悉入虛空法中菩薩孝順供養父母時心念言十方天下人皆使早得佛道以當度脫十方天下人菩薩妻子共居時心念言十方天下人皆使諸有愛欲悉消去菩薩居家有所思時心念言十方天下人皆使脫於愛欲中得道極過度菩薩居家相娛樂作音樂時心念言十方天下人皆使聽受諸經悉聞得如是作音樂時欲聽聞菩薩著七寶時心念言十方天下人皆使脫於重擔去悉得止

休息菩薩在婁女中相娛樂時心念言十方天下人皆使悉入佛經中拔棄於婁洿菩薩在樓上時心念言十方天下人皆使上佛經講堂上悉受諸經無有與等者菩薩布施時心念言十方天下人皆使諸所有但欲施與人無有貪愛者菩薩與妻子恩愛時心念言十方天下人皆使早脫去於婁洿惡露悉棄捐令覺知入虛空中菩薩患厭家中時心念言十方天下人皆使早得解脫無所復拘著菩薩棄家行學道時心念言十方天下人皆使得出去莫復還入愛欲中無所復貪慕菩薩到佛寺時心念言十方天下人皆使但念佛悉入諸經中無所復罣礙菩薩至師和尚所時心念言十方天下人皆使心所念善無有不得者悉入正經中菩薩索作沙門時心

念言十方天下人皆使所至到悉令得成就
莫復中悔止菩薩去白衣時心念言十方天
下人皆使極照明於功德中莫令有懈怠菩
薩受袈裟時心念言十方天下人皆使無所
玷汙持心如佛菩薩剃頭髮時心念言十方
天下人皆使垢濁悉除去莫復與共會菩薩
作大沙門時心念言十方天下人皆使逮漚
起拘舍羅波羅蜜悉得經菩薩作沙門時心
念言十方天下人皆使作沙門時令如佛悉
度十方天下人菩薩持戒時心念言十方天
下人皆使護持禁戒莫令犯如法菩薩受和
尚時心念言十方天下人皆使念所知禪極
過度無所一罣礙菩薩受師時心念言十方
天下人皆使所作悉為狎習如所教法持不
失菩薩自歸於佛時心念言十方天下人皆

使無不歡樂於佛法悉生極好處菩薩自歸
於經時心念言十方天下人皆使悉逮得深
經藏所得智慧如大海菩薩自歸於僧時心
念言十方天下人皆使無不得依度如比丘
僧有所依度樂於佛道德菩薩開戶時心念
言十方天下人皆使早開天門入佛經門莫
復厭還者及自致佛泥洹道菩薩入室中時
心念言十方天下人皆使得度脫所居止處
早如佛所止處早逮得深經衆阿羅漢辟支
佛所不能及菩薩開戶時心念言十方天下
人皆使早閉塞惡道門諸所有宿命惡悉燒
盡菩薩敷床時心念言十方天下人皆使早
入至深經中悉視十方人虛空菩薩坐時心
念言十方天下人皆使坐安如佛坐於師子
座上時莫令心有所著菩薩正坐時心念言

十方天下人皆使入正功德中無令有狐疑
增減佛經中菩薩喘息時心念言十方天下
人皆使喘息定成止足菩薩回念觀時心念
言十方天下人皆使當作是念見無常法菩
薩起坐時心念言十方天下人皆使所見虛
空法無有不了知者菩薩足蹈地時心念言
十方天下人皆使住安隱不復動搖菩薩著
泥洹僧時心念言十方天下人皆使檢持功
德悉愧於世間諸所有早令得佛道菩薩繫
帶時心念言十方天下人皆使結諸功德悉
令堅菩薩被安忍時心念言十方天下人皆
使重益得諸功德悉入諸經中極過度去菩
薩被震越時心念言十方天下人皆使常樂
喜於佛經未曾離時菩薩持楊枝時心念言
十方天下人皆使學諸經悉淨潔得菩薩踈

齒灑口時心念言十方天下人皆使諸垢濁
悉淨潔去清淨住菩薩左右時心念言十方
天下人皆使棄衆惡斷絕婬泆瞋恚愚癡菩
薩行至水時心念言十方天下人皆使上佛
經悉淨潔菩薩持水行持心念言十方天下
人皆使無不謹勑更好心淨潔菩薩澡手時
心念言十方天下人皆使更好手取諸經道
法菩薩洗面時心念言十方天下人皆使入
佛經道面門莫令有瑕穢菩薩向出門時心
念言十方天下人皆使逮所求索悉疾得無
所復罣礙菩薩向道時心念言十方天下人
皆使早得佛莫復令還菩薩行道時心念言
十方天下人皆使入無底經中悉深入經淨
潔身體無所罣礙菩薩行道上下坂時心念言
十方天下人皆使喜樂佛經無有厭極時菩

薩行道下坂時心念言十方天下人皆使入
佛大道中悉貫諸智慧菩薩行曲道中時心
念言十方天下人皆使莫有邪念無令有惡
口菩薩行直道中時心念言十方天下人皆
使心念正道無令有諛諂菩薩見揚塵滿道
時心念言十方天下人皆使諸欲去常得明
經菩薩見掩塵滿道時心念言十方天下人
皆使常柔更心悉得諸慈哀菩薩見陰涼樹
時心念言十方天下人皆使諸所惡法悉除
去通利入佛經中悉覺知菩薩見講堂精舍
時心念言十方天下人皆使聽受諸經悉入
中菩薩見林大樹時心念言十方天下人皆
使無不歸仰供養者天上世間皆悉然菩薩
見山時心念言十方天下人皆使心高才明
諸功德法無有能勝者菩薩見棘樹時心念

言十方天下人皆使疾遠離於婬泆瞋怒愚
癡菩薩見葉樹時心念言十方天下人皆使
道覆蓋得禪迴入三昧菩薩見華樹時心念
言十方天下人皆使莊身得三十二相菩薩
見實樹時心念言十方天下人皆使得華實
悉具足於佛經中菩薩見流水時心念言十
方天下人皆使入佛經流淵中悉得佛智菩
薩見井時心念言十方天下人皆使早開經
門一味無有異菩薩見波水時心念言十方
天下人皆使所道智悉具足開入功德法中
菩薩見泉水時心念言十方天下人皆使所
問慧者多所解悉會於佛經道中菩薩見大
水時心念言十方天下人皆使悉重持諸功
德法無有盡賜時無有能過者菩薩見橋梁
時心念言十方天下人皆使得諸經極過度

人如橋梁過人無有極止時菩薩見宅舍時
心念言十方天下人皆使遠離於愛欲十方
人心所念者皆悉知菩薩見園時心念言十
方天下人皆使心無所拘著不樂於五音樂
五所思菩薩見果園時心念言十方天下人
皆使心無所愁憂悉得深智本根菩薩見戲
園時心念言十方天下人皆使無不精進者
莫令離於佛諸經菩薩見莊嚴大衆出時心
念言十方天下人皆使莊嚴於三十二相悉
逮得菩薩見人愁憂時心念言十方天下人
皆使莫復愁憂菩薩見人喜樂時心念言十
方天下人皆使樂喜深經菩薩見人不樂時
心念言十方天下人皆使恩愛無所著菩薩
見人安隱時心念言十方天下人皆使安隱
逮得如佛安隱菩薩見人勤苦時心念言十

方天下人皆使滅賜諸勤苦悉見正真道菩
薩見人強健時心念言十方天下人皆使強
健如佛時身強健菩薩見人病時心念言十
方天下人皆使念無常悉入虛空中盡究竟
於佛經莫復還菩薩見端正人時心念言十
方天下人皆使愛樂於佛經菩薩見醜人時
心念言十方天下人皆使莫墮醜惡中菩薩
見報恩時心念言十方天下人皆使報恩於
諸菩薩菩薩見不報恩人時心念言十方天
下人皆使無有慳貪悉示人於正道菩薩見
沙門時心念言十方天下人皆使受諸經悉
究竟得菩薩見異道人時心念言十方天下
人皆使諸惡根本悉消盡賜究竟諸經菩薩
見仙人時心念言十方天下人皆使所求願
盡悉得所作爲皆成足菩薩見被鎧人時心

念言十方天下人皆使受鎧悉具足於佛經
菩薩見愚鈍時心念言十方天下人皆使黠
健所作爲莫墮衆惡中菩薩見講經時心念
言十方天下人皆使所聞知無不解慧者菩
薩見帝王時心念言十方天下人皆使自致
爲經中王自然轉經說道無有休絕時菩薩
見太子時心念言十方天下人皆使作佛子
常化生於經中菩薩見公卿時心念言十方
天下人皆使明於深經中所問慧莫不解遣
承用者菩薩見旁臣長使時心念言十方天
下人皆使念正莫有惡無令遠離於諸菩薩
菩薩見城時心念言十方天下人皆使身體
無有與等者悉令人善無有能過者菩薩見
宮闕時心念言十方天下人皆使樂明於心
常令與善功德相值菩薩見持錫杖時心念

言十方天下人皆使常作善爲人所仰常欲
施與人教人爲善法菩薩持鉢時心念言十
方天下人皆使多所饋遺悉受所供養皆入
於無底功德中菩薩行分越時心念言十方
天下人皆使入佛法處無有謬誤時菩薩至
人家門時心念言十方天下人皆使至佛經
門菩薩入門內時心念言十方天下人皆使
入佛智慧內菩薩未受飯食時心念言十方
天下人皆使無有逆難悉入般若波羅蜜經
中菩薩未得飯時心念言十方天下人皆使
莫復墮泥犁禽獸薜荔藍樓惡道中菩薩見
空鉢時心念言十方天下人皆使空於受欲
中菩薩見滿鉢時心念言十方天下人皆使
滿諸功德中菩薩見受飯鉢時心念言十方
天下人皆使奉行佛道事菩薩見慚愧人時

心念言十方天下人皆使無不慚愧於愛欲者菩薩見不慚愧人時心念言十方天下人皆使心所念惡悉棄捐莫不慈哀者菩薩得美食時心念言十方天下人皆使所願無不悉得者心無玷汙菩薩得麤飯時心念言十方天下人皆使柔爽心無不慙傷者菩薩飯時心念言十方天下人皆使如禪食足常飽於經菩薩食味時心念言十方天下人皆使飽味如佛喉咽所化味時悉令逮得於甘露名經菩薩飯已時心念言十方天下人皆使所作爲悉成足入佛經極過去菩薩說經呪願時心念言十方天下人皆使所說道無有盡時悉入佛諸深經中菩薩說經呪願已出去時心念言十方天下人皆使出於三處色無常空中悉受得佛智菩薩入水時心念言

率一

十

十方天下人皆使入佛智慧中過去當來今現在悉平等菩薩浴時心念言十方天下人皆悉洗除心垢悉令去明極照至邊菩薩見熱時心念言十方天下人皆使遠離於熱極過度去菩薩見寒時心念言十方天下人皆使作人中將得極明涼好處菩薩見誦經時心念言十方天下人皆使解於諸經處盡求索智悉攬持諸慧菩薩見佛時心念言十方天下人皆使與諸佛共會心無所罣礙菩薩上向視佛時心念言十方天下人皆使眼所視無所罣礙見無極處菩薩爲佛拜頭腦著地時心念言十方天下人皆使無有能逮見佛頭上者天上天下菩薩拜起正視佛時心念言十方天下人皆使經行無有與等者菩薩繞佛一匝時心念言十方天下人皆使繞

極善所作爲皆究竟賜明經菩薩繞佛三匝
時心念言十方天下人皆使所作爲心常勇
未嘗遠離於佛道菩薩稱譽佛功德威神時
心念言十方天下人皆使所作爲功德不可
計威神不可計功中極過度菩薩洗足時心
念言十方天下人皆使悉得佛神足念飛無
所復罣礙悉入具足菩薩稱譽佛相時心念
言十方天下人皆使身體悉具足如佛經身
菩薩卧出時心念言十方天下人皆使不復
繫於愛欲勤苦中悉淨潔菩薩覺起時心念
言十方天下人皆使得佛智慧得佛十力是
爲菩薩常所行道是釋迦文佛刹凡有百億
釋提桓因毘皆忉利天上悉各思想欲請佛
諸釋提桓因毘皆爲佛於紫紺正殿上施七
寶師子座以天所有名好劫波育雜色若干

種絕殊好皆敷著座上皆施絕好交露帳皆
各於適已佛即悉知之佛便分身威神悉皆
在百億忉利天上釋提桓因毘外門一一釋
提桓因毘皆有一佛凡有百億佛皆與諸菩
薩等俱諸釋提桓因毘皆大歡喜悉出迎爲
佛作禮請佛入佛即與諸菩薩等俱入至紫
紺正殿上帳中坐諸菩薩等悉各於二七寶
蓮華師子座交露帳中坐佛續在是百億小
國土與諸菩薩共坐威神不動十方諸菩薩
復大來會曇昧摩提菩薩復有曇昧摩提菩
薩師利摩提菩薩俱那摩提菩薩墮夜摩提
菩薩沙頭摩提菩薩怛那摩提菩薩沙遮摩
提菩薩阿迦摩提菩薩沙羅摩提菩薩薩和
摩提菩薩
諸菩薩求佛本業經